

02/08/2000

Mahkamah tolak bantahan awal Anwar

KUALA LUMPUR, Selasa - Mahkamah Persekutuan hari ini menolak bantahan awal Datuk Seri Anwar Ibrahim supaya Ketua Hakim Negara menarik diri daripada mendengar rayuan bagi memanggil Perdana Menteri sebagai saksi pembela dalam kes liwatnya.

Keputusan itu dibuat panel tiga hakim, diketuai Ketua Hakim Negara, Tun Mohd Eusoff Chin, yang bersidang bersama Hakim Besar Malaya, Tan Sri Wan Adnan Wan Ismail dan Hakim Mahkamah Persekutuan, Datuk Abdul Malek Ahmad.

Sebelum itu, mahkamah membenarkan permohonan Anwar untuk mengemukakan sendiri hujahnya bagi bantahan awal itu selepas bekas Timbalan Perdana Menteri itu melepaskan enam peguam yang mewakilinya.

Dalam hujahnya Anwar mengemukakan beberapa dakwaan terhadap Eusoff membabitkan Ketua Hakim sendiri serta badan kehakiman.

Berikutan itu, Peguam Negara, Tan Sri Mohtar Abdullah berkata, isu yang dikemukakan oleh Anwar dalam hujahnya bersifat menghina mahkamah.

"Saya menghormati keputusan Yang Amat Arif membenarkan perayu mengemukakan hujahnya sendiri.

"Bagaimanapun, penghujahan itu agak menghina kewibawaan mahkamah. Dakwaan yang dibuatnya tidak berasas dan bukan menjadi sebahagian daripada affidavit atau dokumen mahkamah," katanya.

Anwar dan adik angkatnya, Sukma Darmawan Sasmitaat Madja mengemukakan rayuan terhadap keputusan Mahkamah Rayuan pada 5 Jun lalu yang menolak rayuan mereka supaya Datuk Seri Dr Mahathir Mohamad dipanggil sebagai saksi dalam perbicaraan kes liwat mereka.

Presiden Mahkamah Rayuan, Tan Sri Lamin Yunus bersama Hakim Mahkamah Rayuan Datuk Ahmad Fairuz Sheikh Abdul Halim dan Denis Ong, mengekalkan keputusan Hakim Mahkamah Tinggi Datuk Ariffin Jaka pada 21 April lalu.

Anwar, 53, dan Sukma, 39, dituduh meliwat Azizan di unit nombor 10-7-2, pangsapuri Tivoli Villa, Jalan Medang Tanduk, Bangsar, pada satu malam jam 7.45 antara Januari hingga Mac 1993.

Bagi tuduhan itu, mereka didakwa mengikut Seksyen 377B Kanun Keseksaan yang boleh membawa hukuman penjara 20 tahun dan sebat, jika sabit kesalahan.

(END)